

四庫全書

史部

欽定四庫全書

史部

欽定續通志卷二百五十八

五至

中書<sub>臣</sub>李采覆勘

總校官原任侍講<sub>臣</sub>王燕緒

欽定四庫全書

欽定續通志卷一百五十五

列傳

唐

五十五

韋臯

林蘊

張建封

惜

嚴震

韓弘

公武

韋臯字城武京兆萬年人為建陵挽郎累辟諸府擢監

察御史張鑑鎮鳳翔署營田判官知隴州行營留事德

宗章奉天李楚琳殺鎰叛歸朱泚隴州刺史郝通奔楚琳始泚為鳳翔帥有范陽軍五百隨鎮既罷留戍隴州督以部將牛雲光至是雲光欲劫臯以臣泚謀泄率衆出奔道遇泚奴邀與俱行言泚授臯御史中丞若不受即以兵誅之臯先納奴偽受命因謂雲光曰大使苟無他圖請釋甲以安衆雲光視臯書生無能為命士盡委鎧仗而入明日犒宴臯伏甲兩廡盡殺其衆以雲光及奴首徇泚又遣他奴拜臯鳳翔節度臯亦斬之及從騎

三人縱一人使歸報帝聞詔隴州為奉義軍授臯節度使以  
旌其功臯遣兄平及弇至奉天乃築壇盟將士馳使連  
和吐蕃隴坻遂安帝還都入為左金吾衛大將軍貞元  
元年代張延賞領劍南西川先是雲南蠻附吐蕃為之  
嚮導臯間遣使招諭西南夷稍通二年蠻酋苴那時以  
王爵讓其兄子烏星臯請並封以示褒進詔可三年雲  
南王異侔尋款邊求內屬四年吐蕃寇西川臯擊破於  
清溪關外時雲南未敢顯叛吐蕃亦發兵屯瀘北臯為

遺雲南書轉致吐蕃吐蕃疑塞其趨蜀路雲南怒歸志

益堅

吐蕃入寇  
從通鑑補

遂約東蠻鬼主驃傍苴夢衝絕吐蕃盟

五年東蠻攻吐蕃請濟師臯遣精兵二千共敗蕃衆於

臺登殺大酋乞臧遮遮等虜墜死崖谷不可計遮遮尚結

贊子蕃將之雄貴者也既亡餘城柵無不降進臯檢校

吏部尚書夢衝復與吐蕃盟臯遣別將蘇崕召之詰其

叛斬於琵琶川立次鬼主蠻部震服九年朝議城鹽州

慮虜撓襲詔臯出師牽制乃命大將董勔張芬分出西

山靈關破峨和通鶴等城蕃將論莽熱來援敗其軍進

收白岸鹽州既城加檢校右僕射扶風縣伯於是西山

羗女訶陵等八國皆請入朝臯遣幕官崔佐時趣雲南

與其王盟去吐蕃所立號復南詔舊名

從通鑑補

詔臯統押

近界諸蠻西山八國雲南安撫使俄同中書門下平章

事十三年復爲州

通鑑在五年今從新舊書

後酋帥馬定德與大將

數十人皆來降昆明管些蠻又內附贊普怒北掠靈朔

陷麟州帝詔臯深入十七年八月臯令大將陳泊崔堯

臣等分九道出塞十月大破吐蕃追奔千里遂圍維州  
贊普釋靈朔兵使論莽熱率雜虜十萬來救師據險設  
伏以待虜至謀而奮擊生禽莽熱獻諸朝進檢校司徒  
兼中書令南康郡王帝製紀功碑以賜順宗立久疾王  
叔文干政臯遣劉闢至京師謁叔文請盡領劍南必有  
以報不然惟君之怨叔文怒欲斬闢闢遁去臯知叔文  
多釁自以大臣得與國大議上表請皇太子監國又上  
牋太子暴叔文等姦狀且勸進會裴均嚴綬相繼請太



子遂受禪姦黨悉竄殛是歲臯暴卒年六十一贈太師  
諡曰忠武臯治蜀二十一年前後出師破吐蕃四十八  
萬禽殺酋將千五百斬首五萬餘級獲器械牛羊各數  
十萬功為西南最善撫士凡昏嫁死喪皆厚資給僚掾  
官稍顯即署屬郡刺史恐洩其侈橫不使還朝劉闢踵  
之卒圖不軌朝廷欲追繩其咎或詆臯所進兵器皆鏤  
定秦字陸暢上言向在西蜀知定秦係匠名由是議息  
暢字達夫雅承臯厚禮嘗作蜀道易以美臯者臯始重

賦斂以事月進結主恩府庫既實列州互除租三歲一

復

舊書舉重賦斂蜀土虛竭新書舉務私其民列州互除租彼此迥異今從通鑑

及卒蜀人

畫像拜祀刻石遇舉名諱而鑱去兄聿元和初為國子

司業劉闢與盧文若反舉子

舉子舊書以為舉姪

行式娶文若女

弟聿不以聞闢平行式妻當沒掖庭有司并按聿或以

道遠不應坐乃皆赦之兄平

舊書云從兄平新書云弟平未知孰是

與舉

斬朱泚使赴奉天上功擢萬年尉平子正貫字公理少

孤舉謂能大其門名曰臧孫為單父尉不樂棄去改今

名舉賢良方正異等累遷司農卿坐事貶均州刺史宣  
宗立拜京兆尹擢嶺南節度南海賈舶至大帥必索犀  
象明珠酬以下直正貫一無所取人服其清風俗尚鬼  
正貫毀淫祠教民毋妄祈會海水溢爭言撤祠于神怒  
正貫登城沃酒誓曰不當神意咎在守土無逮下民俄  
而水去民乃信居三歲病亟遺令無厚葬無請謚卒年  
六十八贈工部尚書

林蘊字復夢泉州莆田人交披字茂彥以刺史樊晃奏

署臨汀令舉治行遷別駕蘊世通經西川節度使韋皋  
辟推官劉闢反蘊曉以逆順不聽復遣書切諫闢怒械  
於獄且殺之將就刑大呼曰危邦不入亂邦不居得死  
為幸矣闢惜其直陰戒刑人抽劍磨其頸以脅服之蘊  
叱曰死即死我項豈頑奴砥石耶闢知不可服捨之斥  
為唐昌尉及闢敗蘊名重京師李吉甫李絳武元衡為  
相蘊遺書諷以六事皆當時極敝蘊為韋皋所引重嫉  
其專制感憤闢說然嗜酒多忤物宰相置不用也滄景

程權辟掌書記既而權上四州版籍請吏而軍中習熟  
擅地畏內屬挾權拒命不得出蘊陳君臣大誼諭首將  
入人釋然於是權得去蘊遷禮部員外郎刑部侍郎劉  
伯芻薦之於朝出為邵州刺史嘗杖殺客陶玄之投尸  
江中籍其妻為倡復坐賊杖流儋州而卒

按唐書以蘊世通經列之

儒林考其殺客籍妻坐賊遭貶於儒豈云無玷然能拒  
劉闢出程權剛毅之氣凜凜以故名重一時本傳載其  
為韋舉所引重茲移附舉  
傳後俾得從其類謹識

張建封字本立鄧州南陽人

舊書充州人

客充父玠少任俠

安祿山反使李廷偉脅徇山東魯郡太守韓擇木迎館之玠率諸豪將入斬之擇木懼不許參軍張孚助其謀乃殺廷偉事聞擇木孚皆蒙賞而玠去之江南不言功建封善屬文能辨論慷慨以功名自許寶應中蘇常盜起代宗詔中官馬日新與李光弼共討建封乃見日新請往說諭果一日降數千人縱歸田里由是知名令狐彰節度滑毫奏置府中建封心非其不朝往見轉運使劉晏晏使筦漕務歲餘罷時馬燧為三城鎮遏使素相

善表為判官燧討李靈耀軍務悉咨決從鎮河東建中  
初燧薦之於朝楊炎將處以要職為盧杞所惡出為岳  
州刺史李希烈叛壽州刺史崔昭與通書疏德宗召宰  
相選代昭者杞倉卒間白用建封希烈僭號陳少遊陰  
附之希烈遣楊豐齎偽赦二畀建封少遊建封斬豐首  
送偽書於行在少遊聞而恚且懼建封因劾其附賊狀  
帝不暇治希烈又偽署杜少誠淮南節度約破壽州以  
趨江都建封守霍邱秋柵賊不能東帝還自梁遷御史

大夫濠壽廬觀察使大繕裨隍遠近悅附希烈選精銳  
來攻輒沮魍賊平任一子正員官始李洧以徐州降洧  
卒高承宗獨孤華繼任困弱不能支寇李泌建言東南  
漕自淮達汴徐之壅橋為咽喉今徐州刺史高明應甚  
少倘為李納所并則梗餉路而失江淮矣請以建封代  
貞元四年授建封徐州刺史益以泗濠二州為節度使  
久之檢校尚書右僕射十三年入朝即日召見延英詔  
會朝赴大夫班以示優異建封賦朝天行以獻賜名馬



珍具甚厚京城以宦者主官市抑買人物十不償一至  
有重荷趨肆而徒返者諫臣交論不納建封間為帝言  
頗順聽詔蠲逋賦帝問何如對曰殘逋決無可斂雖除  
之百姓尚無所益河東節度使李說華州刺史盧微皆  
病不任職金吾將軍李翰好刺細事規寵建封皆陳劾  
之帝皆嘉納上巳曲江賜宴特詔與宰相同榻食還鎮  
帝以詩餞當時高秩大勲如馬燧渾瑊劉玄佐李抱真  
等所未得也復使左右賜以所持鞭曰卿忠節歲寒不

渝用此為沉建封又賦詩自勵十六年以疾求代未至而卒年六十六贈司徒建封涖徐十年軍事大治善客人過亦未嘗曲法貸姦其言忠義感激人皆畏悅士無賢不肖遊其門者禮遇維均許孟容韓愈皆奏署幕府有文章傳於世子愔

愔以蔭補虢州參軍建封卒府佐鄭通誠懼軍亂謀引浙西過兵為援舉軍怒殺通誠及大將數人表請愔為留後帝不許割濠泗隸淮南命杜佑討徐泗州刺史張

任戰塢橋兵敗帝乃授愔留後俄進武寧節度元和初  
被疾請代召為工部尚書以王紹帥武寧濠泗仍還徐  
徐人乃安愔未踰境卒凡治徐七年其政稱理贈尚書  
右僕射

嚴震字遐聞梓州鹽亭人本農家子豐於財至德乾元  
中數出資助邊授州長史嚴武鎮西川擢署押衙委以  
軍務武卒山南西道節度府表為鳳州刺史母喪罷起  
為興鳳兩州團練使為政清嚴興利除害遠邇咨美劍

南黜陟使韋楨狀震治行第一賜上下考封鄖國公遷  
山南西道節度使朱泚反遣腹心穆廷光等齎書招誘  
震斬以聞李懷光既通賊帝欲移蹕山南震聞馳表奉  
迎令大將張用誠以兵五千扞衛用誠有反計會震牙  
將馬勛繼至帝告以故勛曰臣歸取符召之即不受斬  
以復命計日往得震符還請壯士五人與俱用誠以勛  
未知其謀迎歸傳舍左右嚴侍勛陰令焚草館外士寒  
爭附火勛從容出符曰大夫召君用誠懼將走壯士自

後禽之用誠子斫傷勛首左右格殺其子而仆用誠勛  
即其營士皆擐甲矣勛大言曰若父母妻子在梁州今  
棄而反何所利大夫取用誠於若等無與衆不敢動縛  
用誠送震杖殺之拔其副以統師翌日發奉天既入駱  
谷懷光追騎至賴山南兵以免尋加檢校戶部尚書封  
馮翊郡王宰相以梁地瘠請幸成都震曰山南密邇畿  
輔李晟圖收復方藉六師為聲援如引而西諸將顧望  
奏功無期晟表至亦請駐蹕梁洋議遂定梁漢雖領郡

十五賦入纔比東方數大縣安史後山賊剽劫戶口減半震勸課鳩斂有法民不煩擾而行在供億無闕車駕將還進檢校左僕射改梁州為興元府用震為尹久之同中書門下平章事貞元十五年卒年七十六贈太保諡曰忠穆從孫譔與宰相楊收善咸通中擢江西節度使改號鎮南軍收得罪韋保衡奏譔賊賄狼藉遣使按覈詔賜死

韓弘滑州匡城人少孤依其舅劉玄佐由諸曹試大理

評事玄佐卒子士寧被逐弘事劉全諒署都知兵馬使  
全諒死汴軍思玄佐之惠共請監軍表弘為留後詔充  
宣武節度副大使知節度事始吳少誠與全諒謀襲陳  
許使數輩猶在館弘喜得旄節即斬少誠使選兵三  
千助討少誠敗之汴自劉士寧以來軍益驕及殺陸長  
源主帥勢輕不可制弘察亂魁劉錡等三百人數其罪  
悉斬牙門流血丹道弘對賓僚言笑自若由是訖弘去  
無敢肆者李師古欲侵鄭滑屯兵曹州或告剪棘夷道

師且至弘曰兵來不除道也師古計窮引去少誠以牛  
革遺師古師古資以鹽過界弘皆阻留曰於法不得私  
相餽師古等皆深憚之

從通  
鑑補

累授檢校司空同中書門下

平章事弘以官與太原王鐸等耻居其下憲宗方藉  
以臨淮西改司徒班鐸上嚴綬為賊所敗拜弘淮西諸  
軍行營都統使扞兩河而令李光顏烏重胤擊賊弘不  
離境遣子公武領兵屬光顏弘陰為逗撓每諸將告捷  
輒不怡元濟平以功兼侍中封許國公李師道誅弘大



懼入朝固願留京師冊拜司徒中書令帝崩攝冢宰俄出  
為河中節度使以病請還仍前守司徒中書令卒年五  
十八贈太尉謚曰隱初弘來朝獻馬三千絹五十萬它  
錦綵三萬而汴庫錢絹尚百餘萬馬七千糧儲兵械不  
可數弘沈謀勇斷莊重寡言罪人準法不自為輕重詔  
使至多倨待及齊蔡平勢屈請覲然兩朝尊寵竟以名  
位終子公武

公武字從偃性恭遜為宣武行營兵馬使討蔡有功檢

校左散騎常侍鄜坊等州節度弘入朝亦乞罷徵為右  
金吾將軍弘出河中弘弟充徙宣武乃曰二父居重鎮  
孺子敢復當金吾職固辭改右驍衛大將軍卒贈戶部  
尚書諡曰恭

充本名瓘少亦依舅氏歷河陽昭義牙將弘領宣武召  
主親兵授御史大夫弘持法峻人不自保充謙謹無少  
怠恒以得士不自安請入宿衛弘許而未遣因獵單騎  
歸洛陽擢右金吾衛大將軍歷少府監鄜坊等州節度

穆宗立幽鎮魏復亂朝廷以王承元帥冀卒屯滑州恐相煽誘命充與承元更代會汴軍逐李愿立牙將李齊主留務充素為汴衆悅服詔節度宣武兼統義成軍討齊敗之郭橋李質斬齊遂入汴時李光顏亦奉討齊詔欲先得汴任軍俘掠汴監軍姚文壽謀內其師充聞急馳至城下汴人望見歡躍無復疑貳帝始遣人問破賊期充對一月可破方二旬即克帝謂充料敵如神加檢校司空散齊所脅為兵者三萬密籍首亂千餘人令出境

曰敗後者斬內外安堵卒年五十五贈司徒謚曰肅充  
雖將家不事豪侈歷三鎮儉約如儒者臨機決策無遺悔  
世推善將自弘去汴監軍選牙兵二千直閣下日給酒  
肴物力為之屈充未入李質總軍事曰韓公至而頗去  
二千人食必失人心不去無以繼何可留此弊遺吾帥  
悉罷之而後迎充質節士也齊邀帥節勸之不從齊首  
發疽委質以兵遂禽之終金吾將軍

欽定續通志卷二百五十五

欽定四庫全書

欽定續通志卷二百五十六

列傳

唐

五十六

鮑防

李自良

蕭昕

薛播

樊澤

宗師

王緯

吳湊

士矩

鄭權

陸亘

盧坦

闕濟美

柳晟

崔戎

鮑防字子慎襄州襄陽人幼孤貧篤學善詞章第進士  
歷諸府僚屬太原帥薛兼訓被疾代宗授防少尹節度  
行軍司馬俄知留後兼太原尹節度使帝美其政詔圖  
形別殿轉福建江西觀察使入為左散騎常侍從德宗  
至奉天進禮部侍郎封東海郡公貞元元年策賢良方  
正得穆質柳公綽崔邠魏弘簡等時歲旱策問陰陽祲  
沴質對引漢卜式請烹弘羊以指宰輔右司郎中獨孤  
恹欲下質防曰使上聞所未聞不亦善乎卒置高第世

美防知人初與知雜御史竇參塗遇導騎不引避參鞭其僕及參為相防尹京兆遽令以工部尚書致仕防曰吾與蕭昕子齒坐宰相餘怒而同昕老憤鬱以卒年六十九贈太子少保諡曰宣防尤工於詩與中書舍人謝良弼友善號鮑謝云

李自良兖州泗水人天寶亂以戰功至右衛率偕素修討賊袁晁試殿中監薛兼訓移鎮太原又為牙將及鮑防代鎮值回紇入寇防遣將焦伯魚迎擊自良曰寇遠

來難與爭鋒宜堅壁不出築二壘搯其歸路防不聽伯  
瑜果大敗馬燧代防表為軍候自良勤恪有謀燧深委  
信從討田悅破李懷光功在諸將右燧罷兵德宗欲以  
自良繼其任自良因事燧久固辭不敢當咸多其讓乃  
授右龍武大將軍入謝帝終以河東近虜謂曰卿進退  
誠有禮然北門之守無易卿者勉為朕行拜檢校工部  
尚書充河東節度使居鎮九年簡儉有法上下悅附卒  
於官贈尚書左僕射



蕭昕字中明梁鄱陽王恢七世孫世居河南開元天寶  
間再中博學宏辭科調尉壽安累遷左補闕安祿山反  
為副元帥哥舒翰掌書記翰敗間道入蜀奉誥冊上肅  
宗歷中書舍人禮部侍郎從代宗幸陝擢國子祭酒請  
崇太學以樹教本詔羣臣及六軍子弟肄業者聽補生  
員大歷初持節弔回紇回紇恃功廷詰昕曰非我無以  
平中國亂奈何不時歸我市馬直衆失色昕徐曰國家  
賞定寇功絲毫不遺況鄰國乎爾與叛臣僕固懷恩連

禍引吐蕃犯郊甸吐蕃敗走始悔懼叩願求和非天子  
念舊功當隻馬不得出塞是爾自絕豈我失信回紇慚  
厚加禮遣使約和所歸轉工部尚書封晉陵侯朱泚之  
難所年八十餘徒步出城賊求之亟獨竄山谷至奉天  
加太子少傅爵郡公兼禮部尚書知貢舉以太子少師  
致仕卒年九十三贈揚州大都督諡曰懿所始薦張鎬  
來瑱鎬不數年位將相瑱為將著威望在禮部擢杜黃  
裳高郢裴垍其後黃裳等並為名執政

薛播河中寶鼎人曾祖文思中書舍人播早孤伯母林  
博通經史教授諸子及播兄弟後播兄弟七人皆第進  
士衣冠以為榮累受殿中侍御史武功萬年令播溫敏  
而裕與人交有常李栖筠常袞崔祐甫並相器重祐甫  
秉政拜中書舍人出為汝州刺史坐事貶再遷至河南  
尹以禮部侍郎卒贈本曹尚書子公達擢進士第佐鳳  
翔軍其帥懸賞集射設的高數丈一軍莫能中公達揖  
曰請為公歡三發皆中衆大呼笑帥不喜自免去復佐

河陽軍終國子助教

樊澤字安時河中人幼孤依外家客河朔薛嵩帥相衛  
表為堯山令舉賢良方正次潼關雨淖不能前有熊執  
易同宿逆旅哀其困自罷所舉輟衣與馬以贈澤擢上  
第楊炎善之薦為左補闕澤武勇嫻韜畧嘗召對延英  
德宗嘉其論兵與己意合累遷山南東道司馬尋拜節  
度使數與李希烈接戰擒其驍將張嘉瑜杜文朝梁俊  
之等遂收唐隋二州貞元三年改鎮荆南會山南東道

嗣曹王臯卒軍亂以澤威惠素著襄漢復徙山南東道  
加檢校尚書右僕射十四年卒年五十七贈司空諡曰  
成子宗師

宗師字紹述始為國子主簿元和中歷金部郎中縣絳  
二州刺史有治聲進諫議大夫未拜卒宗師喜施子家  
財悉散姻舊妻子以不給告笑不答學力淹通韓愈嘗  
稱薦其論議平正有經據所著春秋傳魁紀公樊子凡  
百餘篇

王緯字文卿并州太原人父之咸與弟之賁之渙皆有  
文緯舉明經以書判入等為長安尉大厯中路嗣恭觀  
察江西緯與李泌同為判官嗣恭希元載意欲殺泌緯  
解救獲免泌入相奏緯於已有恩德宗許為報進給事  
中未幾擬授浙西觀察使帝曰黃門要地獨不留議事  
耶泌對曰浙西賦入尤劇緯清而忠能勝惠養之任制  
可初州縣有韓滉時罰錢未入者十八萬緡吏請哀為  
進奉緯奏蠲以紓民許之加御史大夫兼諸道鹽鐵轉

運使忤裴延齡意改檢校工部尚書卒年七十一贈太子少保緯居官清白而傷於苛碎好用刻深吏督察其下以此見病

吳湊章敬皇后弟由布衣與兄淑同日開府賜官封皆等湊畏太盛乞解太子詹事改檢校賓客無家令進左金吾衛大將軍滑帥令狐彰汴帥田神功繼沒其下乘喪搖亂代宗命湊持節撫慰至則委曲說諭度可行者為之奏請各得其情軍中驩附帝深重其才元載當國

久姦迹日彰帝欲加之法顧左右無可與計召湊密圖  
及收載王縉楊炎王昂韓會包佶等皆當坐湊建言法  
有首從不應概用極刑縉等乃得減死德宗初出為福  
建觀察使美譽四聞宰相竇叅以私憾數加短毀且言  
湊風痺不良趨走帝召驗非實由是惡叅擢湊陝虢觀  
察使代滲黨李翼宣武劉玄佐卒命湊馳代未至汴軍  
立玄佐子士寧帝欲遣兵納湊叅請授士寧節鉞以沮  
湊還為右金吾大將軍貞元十四年大旱穀貴人多流



亡帝咎京兆尹失理以湊代韓臯湊勤于為政民庶愛  
向時京師苦宮市湊見便殿因言宮中所須責臣可辦  
即不欲外吏與聞內禁事乞選中官高年謹信者為宮  
市令平價和售流議自息又陳掌閑驍騎飛龍內園禁  
軍諸司供役太繁宜有蠲省帝輒順聽府吏以湊起戚  
藩不諳簿領每有疑獄候湊將出方呈冀幸容欺湊倉  
卒一視指摘盡中其弊掾屬非大過不榜責召至庭詰  
服釋去羣相劾最庶事畢舉文敬太子義章公主之薨

帝欲厚葬鳩工妨農湊極言不避或勸論諫不宜過繁恐上厭苦湊曰上憂勞四海豈因所愛而疲民以逞反覆啓悟幸一動則民受賜不少進兼兵部尚書溝疾不納醫巫家人泣請答曰吾以庸才起田畝位三公顯仕四十年年七十更欲何求古來外戚令終者有幾吾得歸侍先人地下足矣帝聞詔侍醫敦進湯劑不獲已飲之卒年七十一贈尚書左僕射謚曰成先是官街樹稀有司補植榆湊謂榆不足蔭玩易以槐及槐陰成而湊

已亡人撫樹懷其澤湊自貞元以來特承恩顧小心奉職未嘗有過為世外戚表云

淑子士矩有文學喜與豪俊遊開成初為江西觀察使饗宴侈縱初至庫錢二十七萬緡晚年纔九萬軍資不給中外申論文宗弗窮究僅貶蔡州別駕御史中丞狄兼謩言士矩負陛下法難私請遣御史即訊庶杜江淮它鎮循習意乃流端州

鄭權汴州開封人擢進士第為涇原帥劉昌從事昌被

疾入朝度軍情必變以權寬厚俾主留務昌去兵果亂  
權挺身冒白刃明諭順逆誅首亂數人一軍畏服德宗  
嘉之授行軍司馬擢河南尹拜山南東道節度使尋徙  
德棣滄景軍會討李師道奏置歸化縣綏納降附滄州  
刺史李宗奭數違節制權劾奏有詔追赴京師宗奭諷  
州兵留已帝更命烏重胤代權滄人懼共逐宗奭至都  
斬以徇授權節度幽寧或訟權誣宗奭左降原王傅改  
右金吾衛大將軍穆宗立持節為回鶻告哀使權魁偉

有閎辨與可汗爭曲直詞氣激壯虜深敬異使還遣工  
部尚書日用豪侈俸入不足乃結權幸出鎮嶺南多哀  
珍貨輸賂左右助力者大為朝士所嗤卒于官

陸亘字景山吳郡人元和三年應制科中第補萬年丞  
再遷太常博士有禮史孟真久練其事凡大禮儀未達  
者率就訪真倚以倨橫會草冊皇太子儀真參議偃蹇  
亘笞逐之胥曹失色進戶部郎中太常少卿歷充蔡虢  
蘇四州刺史浙東觀察使復徙宣歙卒年七十一贈禮

部尚書亘嚴重強毅所至稱理初赴兗州對延英具陳  
節度分兵屯屬州刺史不能制之弊因詔屯兵得隸刺  
史温州自經賊亂奪官吏半俸代民租後相沿更以為  
姦亘按舉贓罪表請還官全稟吏畏而賴之

盧坦字保衡河南洛陽人為河南尉杜黃裳為尹嘗召  
坦曰某家子昵惡人破產盍往察坦曰凡居官能積財  
者必剝下以致之使子孫善守是天富不道也不若恣  
其所為以歸于人黃裳異其言遇加厚鄭滑節度李復

表為判官復病甚監軍薛盈珍封庫府納甲士牙中舉  
軍大恐坦勸止乃安復卒詔姚南仲代坦知盈珍輕南  
仲南仲必不受留恐及禍護復喪歸東都補壽安令縣  
人機織未就而賦限已窮坦詣府請延十日不許坦令  
但織而輸勿顧限違之不過罰令俸耳由是知名入為  
刑部郎中無侍御史數月遷中丞時赦令已禁止諸道  
進奉錢山南節度使柳晟浙西觀察使閻濟美違詔輸  
獻坦劾奏二人白衣待罪帝諭坦曰彼所獻皆家財朕

已許原不可失信坦曰敕令所以布大信也陛下勿以小信失大信帝曰既受之奈何坦請出歸有司從之李錡誅有司將毀其祖神通墓坦上疏諫止僕射裴均在班踰位坦引之退以姚南仲為例均曰南仲何人曰是守正不交權幸者均怒罷為左庶子尋拜宣歙觀察使初劉闢壻蘇彊坐誅其兄弘自免官去有才行人莫敢用坦奏弘與弟距三千里宜不通謀請署判官帝曰使彊在尚錄其才況彼兄耶江淮遇早穀貴或請抑其價



坦曰直賤他州穀皆不至任之便既而商米至至市估  
遂平遷戶部侍郎判度支河毀西受降城宰相李吉甫  
議移駐天德坦謂城當磧口制狄要衝若避河流退徙  
不過數里今天德地僻倚山去河遠烽候不接虜至不  
知無故而感地二百里非計也城使周懷義與坦議同  
吉甫不悅出坦為東川節度使坦與宰相李絳議多協

絳藉為助坦出半歲而絳罷吳元濟之叛

新書作吳少  
誠之誅吳少

誠以貞元十六年十月復官爵以元和四年死未嘗誅  
也且李絳罷相在元和九年二月盧坦出鎮東川又在

其前半歲上距少誠之死已四年矣以敘  
次先後考之亦非是今據吳鎮糾謬改正 詔東川以兵  
二千屯安州坦朔望使人存問其家士皆感慰無逃還  
者惟請收軍吏閏月糧助行營為人所非元和十二年  
卒年六十九贈禮部尚書

閻濟美者擢進士第貞元末由婺州刺史遷福建觀察  
使尋徙浙西為治簡易人稱長者常賦外未嘗有所增  
其罷浙西也在道方見詔而貢獻無所還故帝為言之  
復刺華州入為祕書監以工部尚書致仕卒諡曰溫

柳晟河中解人父潭尚和政公主官太僕卿晟年十二居父喪以孝聞代宗于諸甥中特加恩寵養之宮中使

與太子諸王受學于吳大瓊

吳通玄傳作道瓊

并子通玄既長

授檢校太常卿德宗立以晟幼同硯席尤親信用事朱泚反從至奉天晟與賊帥多舊故請入京城說諭以攜其黨帝壯而遣之泚右將軍郭常左將軍張光晟皆奉命約自拔歸俄謀洩繫晟獄中晟夜半坎垣毀械而亡斷髮為僧間道歸行在帝見而流涕車駕還擢原王府

長史吳通玄得罪晟欲上書其弟止曰天子方怒無自  
貽悔不聽凡三上通玄得減死

案通鑑貞元八年賜諫  
議吳通玄死特減大辟

等一晟累遷將作少監尋節度山南西道府兵討劉闢還

未入城復詔戍梓州衆怒欲謀變晟疾驅入勞軍畢問  
曰若等何為成功曰誅驕不受命者晟曰既知劉闢干  
誅奈何復欲使後人誅若等士皆免胄拜願赴戍所入  
為將作監充回鶻冊立使至則詰之曰屬聞可汗無禮  
自大去信自強禮信不能守何足奉中國可汗及諸貴

人駭愕跪伏成禮使還進左金吾衛大將軍爵為公卒  
年六十九贈太子少保晟才敏下士好施惟自興元入  
朝貢獻不如詔被劾憲宗念其賢竟弗暴其事

崔戎字可大玄暉從孫

宰相世系表云  
玄暉四世從孫

舉明經授太子

校書郎調藍田主簿淮南帥李鄴衛次公前後交辟裴  
度節度太原署叅謀時王承宗以鎮州叛度請戎往諭  
承宗感泣聽命入為殿中侍御史累遷諫議大夫雲南  
蠻擾成都詔戎持節宣惠兩川奏罷稅外薑芋錢三分

其當賦者以一分準繒布優其估以寬民公私廢置莫不稱便還拜給事中出刺華州吏援舊事置錢萬緡供私用戎不取臨去悉以享軍召吏謂曰吾不欲矯激以誇後人也徙充海沂密觀察使民遮道擁留至解鞵斷鞶值詔使尚在環向泣請戎至夜半單騎亡去乃止泣充州鉏姦吏十餘輩羣情大悅歲餘卒年五十五贈禮部尚書子雍字順中為和州刺史龐勛兵劫烏江雍不能抗遣人持牛酒以勞而密表其狀民不知上訴宰相

路巖素有隙傳其罪賜死

欽定續通志卷二百五十六



欽定四庫全書

欽定續通志卷二百五十七

列傳

唐 五十七

徐浩

呂渭 溫

于頔

王智興

晏平  
晏宰

杜兼

羔  
中立

杜亞

范傳正

孟簡

劉伯芻 寬夫

楊憑

凝  
敬之

潘孟陽

崔元畧 鉉

韋綬

徐浩字季海越州人擢明經張說稱其才繇魯山主簿  
為集賢校理遷右拾遺辟幽州張守珪幕府改監察御  
史歷河陽令有治績東都留守王倕表署其府民有妄  
作符命者浩校篆詰其詐累遷都官郎中為嶺南選補  
使又領東都選肅宗立授中書舍人四方詔令多出浩  
手遣辭贍速又叅太上皇誥冊寵遇罕與為比兼尚書  
右丞建災故事有司斷獄必刑部審覆自李林甫楊國

忠當國就宰相府斷事尚書以下未省即署乖慎恤意

請如故便詔可詳斷復自此始進國子祭酒以李輔國

譖貶廬州長史代宗復徵拜中書舍人遷工部侍郎會

稽縣公出為嶺南節度觀察使兼御史大夫召拜吏部

侍郎集賢殿學士

按通鑑吏部侍郎楊綰典選平允性介直不附元載嶺南節度使徐浩貪

佞傾南方珍貨以賂載載以綰為國子祭酒引浩代之

坐妾弟以優冒選託侍郎

薛邕注授京尉為御史大夫李栖筠所彈貶明州別駕

德宗即位徵拜彭王傅進郡公建中三年卒年八十贈

太子少師諡曰定浩父嶠之善書

舊書父嶠官至洛州刺史

以法授

浩浩尤工草隸世狀其法曰怒貌抉石渴驥奔泉浩初以文學稱晚節頗嗜財惑於所嬖卒以此敗云

呂渭字君載河中人父延之越州刺史浙東節度使渭舉進士累授婺州永康令大理評事浙西觀察使李涵辟為支使再遷殿中侍御史大厯末涵為元陵副使渭又為判官涵自御史大夫改太子少傅渭上言涵父名少康當避宰相崔祐甫善其言擢司門員外郎御史臺

勅渭昔涵再任少卿不以嫌今為少傅為慢官疑渭為  
涵游說乃貶渭歙州司馬貞元中累遷禮部侍郎始中  
書省有柳樹建中末枯死德宗自梁還復榮茂人以為  
瑞柳渭試進士取為題帝聞不以為善舊書云帝  
間而嘉之又與  
裴延齡為姻家擢其子操上第會入閤遺私謁之書于  
廷出為潭州刺史貞元十六年卒年六十六贈陝州大  
都督子溫恭儉讓

溫字和叔一字化光貞元末登進士第與韋執誼交厚

因善王叔文再遷為左拾遺以侍御史副張薦使吐蕃  
會順宗立薦卒于青海吐蕃以中國有喪留溫不遣時  
叔文秉權與游皆貴顯溫以絕域不得遷常自悲元和  
元年乃還而柳宗元等九人皆坐叔文貶溫獨以奉使  
免進戶部員外郎溫文采膽逸為時所稱性陰躁好竒  
近利與竇羣羊士諤昵羣為御史中丞薦溫知雜事士  
諤為御史宰相李吉甫持之久不報時吉甫為中官所  
惡將出鎮揚州溫乘間傾之會吉甫病召醫人陳登診

視夜宿安邑里第溫令吏捕登鞠問且奏吉甫陰事憲  
宗駭異既詰辨皆妄言乃貶溫均州刺史朝議責太輕  
再貶道州久之徙衡州不得意發疾卒年四十所著凌  
烟閣功臣銘張始興畫贊移博士書頗為文士所賞有  
文集十卷恭字恭叔尚氣節喜縱橫孫吳術為山南西  
道府掌書記進殿中侍御史終嶺南府判官儉亦為侍  
御史讓至太子右庶子皆美才吉甫再入中書長慶後  
德裕黨盛呂氏諸子無至達官者

于頔字允元河南人後周太師謹七世孫蔭補千牛

權

德興所作頔家廟碑頔五代祖象賢以前皆仕北朝曾祖範顯武令祖江未仕父復泗州司馬入唐三代無達官亦無致身王事者新舊書俱云得蔭未詳何據調華陰尉累勞遷侍御史為

吐蕃計會使擢長安令駕部郎中出為湖州刺史修復湖陂溉田三千頃歲獲秔稻蒲魚無慮萬計州地庠薄葬者不掩權頔為坎瘞枯骨千餘人賴以安未幾改蘇州罷淫祠濬溝澮端路衢為政有績然暴橫少恩杖前部尉以逞憾觀察使王緯以聞懿宗不省俄遷大理卿



為陝觀察使益峻蜀苛虐官吏惴恐參軍事姚峴不  
勝虐自沈於河貞元十四年拜山南東道節度使是時  
吳少誠叛頔率兵自唐州戰吳房朗山取之禽其將李  
璨又勝之濯神溝於是請升襄州為大都督府廣募戰  
士儲良械櫛然有專漢南意帝晚務姑息頔奏建無不  
從公斂私喻持下益急而慢于奉上誣劾鄆州刺史元  
洪朝廷重違其意為流瑞州命中人護送至棗陽頔遣  
兵劫洪還拘之又表責洪太重改吉州長史遣使厚諭

乃已嘗怒判官薛正倫奏貶陝州長史比詔下頓中海  
奏復署舊職累遷檢校尚書左僕射同中書門下平章

事封燕國公

按舊書本紀頓於憲宗嗣位之十二月甲辰加平章事元和二年八月辛巳封燕國

公此與舊傳俱序于憲宗立之前與紀互異

俄擅以兵取鄧州帝不問憲宗

立權綱自出頓稍懼願以第四子季友尚主帝以永昌

公主降焉遂入朝拜司空同中書門下平章事請準杜

佑月三奉朝詔可時宦者梁守謙幸於帝頗用事有梁

正言者與頓子敏善敏因正言厚賂守謙求頓出鎮久

不報敏怒其結責所饋誘正言家奴支解之棄溷中家  
童上變詔捕頓吏沈辟及它奴送御史獄命中丞薛存

誠刑部侍郎王播大理卿武少儀雜問之頓貶為恩王

傅子敏竄雷州至商山賜死次子季友奪二官正言誅

死久之拜戶部尚書

按舊書本紀頓于元和八年二月  
貶恩王傳九月壬申為太子賓客

十年十月壬子為戶部尚書舊傳于頓貶官後但書其  
改授太子賓客此又但書其拜戶部尚書各紀一官遂

致互又坐季友居喪荒宴削金紫光祿大夫明年乃致  
異

仕宰司將以太子少保官之帝改署賓客鬱鬱不得意

卒贈太保太常謚曰厲季友從穆宗獵苑中求改謚會  
李愬亦為請更賜謚曰思

王智興字匡諫懷州溫人少驍銳為徐州牙兵事刺史  
李洧洧棄李納挈州自歸納怒急攻洧智興能駛步奉  
表不數日至京師告急德宗出朔方軍五千擊納解去  
自是為徐特將王師討吳元濟李師道謀撓王師數侵  
徐救蔡節度使李愿遣智興率步騎拒賊屢破之累遷  
侍御史元和十三年伐師道智興攻拔金鄉魚臺僭斬

萬計賊平進御史中丞明年召還為沂州刺史長慶初河朔用兵加檢校左散騎常侍充武寧軍副使河北行

營諸軍都知兵馬使帥兵三千渡河屬朝廷用崔羣為

武寧節度使羣畏智興難制密請追還京師

按舊書智興傳亦云

崔羣慮其疏軍難制密表請追赴闕授以他官惟新舊書羣傳云羣以智興得士心請因授智興節鉞與此互

異未報會赦王廷湊諸節度班師智興還羣遣寮屬迎

之令士委甲而入智興心不悅因勒兵斬關入殺異已

者十餘輩然後謁羣謝曰此軍情也羣乃治裝去智興

以兵衛送還朝至埇橋掠鹽鐵院及貢物劫商旅逐濠  
州刺史侯弘度朝廷甫罷兵不能討即詔檢校工部尚  
書充本軍節度使李宥攻宋州智興悉銳師破之漳口  
宥平加檢校尚書左僕射李同捷以滄德叛智興請討  
賊詔拜檢校司徒同中書門下平章事滄德行營招撫  
使拔棣州諸將開戰愈力遂有功入朝燕麟德殿賜予  
備厚冊拜太傅封雁門郡王進兼侍中改忠武河中宣  
武三節度卒年七十九贈太尉子九人晏平晏寧知名

晏平幼從父軍以討同捷功檢校右散騎常侍朔方靈  
鹽節度使父喪擅取馬四百兵械七千自衛御史劾之  
詔改永州司戶參軍

晏寧後去晏獨名寧少拳果長隸神策軍甘露之變以  
功兼御史大夫為光州刺史有美政觀察使段文昌薦  
之朝除鹽州刺史持法嚴人不甚便累擢邠寧慶節度  
使回鶻平徙忠武軍王師討劉稹詔寧以兵出魏博趨  
磁州復詔寧兼統河陽行營進取天井關賊黨離沮李

德裕以宰相破竹勢不遂敗澤州以其子晏實守磁為  
顧望計帝有詔切責宰相懼急攻陵川破賊石會關進攻  
澤州其將郭誼殺禎降宰相周墀劾之乃還軍吐蕃引  
宗初入朝厚結權幸求宰相周墀劾之乃還軍吐蕃引  
党項回鶻寇河西詔統代北諸軍進擊以疾不任事徙  
河陽罷為太子少保分司東都進少傅卒晏實幼機警  
智興自養之故名與諸父齒禎平擢淄州刺史終天雄  
節度使



杜兼字處弘中書令正倫五世孫初正倫無子故以兄子志靜為後父廩為鄭州錄事參軍事安祿山亂逃去賊索之急宋州刺史李峇以兵迎之為追騎所害兼尚幼逃入終南山伯父存介為賊執臨刑兼號呼願為奴以贖遂皆免建中初進士高第徐泗節度使張建封表至其府積勞為濠州刺史性浮險尚奢侈德宗既厭兵大抵刺史重代易至歷年不徙兼探帝意謀自固即修武備募占勁兵三千帝以為才遂橫恣僚官韋賞陸楚

論事忤燕訛劾以罪殺之衆莫不寃又妄繫令孤運而陷李藩欲殺之不克元和初入為刑部郎中改蘇州刺史比行上書言李錡必反留為吏部郎中尋擢河南尹卒年七十

從弟羔貞元初及進士第有至性父死河北母更兵亂不知所之及羔為澤潞判官鞠獄有媼辨對不凡乃羔母因得奉養而不知父墓區處晝夜哀慟他日舍佛祠觀柱間有文字乃其父臨死記墓所在羔奔往有耆老

識其隴因是乃得葬元和中為萬年令時許季同為長  
安令京兆尹元義方責租賦不時繫二縣吏將罪之羔  
等辯列尤苦尹不為縱羔乃謁宰相請移散官憲宗遣  
中使問狀具對府政苛細力不堪奉詔皆免官奪尹三  
月俸議者以羔為直未幾授戶部郎中後歷振武節度  
使以工部尚書致仕卒贈尚書右僕射諡曰敬

子中立字無為以門廕歷太子通事舍人開成初尚真  
源長公主遷光祿少卿駙馬都尉中立數求自試轉太

僕衛尉二少卿歷左右金吾大將軍捕繫京師惡少立  
箠死遷司農卿繩吏急反為中傷左徙慶王傳久之復  
拜司農卿入謝帝曰卿用法深信乎答曰轍下百司養  
名不肯事如司農尤叢劇陛下無遽信流言假臣數月  
事可濟帝許之初度支度六宮殮錢移司農司農季一  
出付吏大吏盡舉所給于人權子錢以給之不以時中  
立取錢納帑舍率五日一出吏不得為姦後遂以為法  
加檢校右散騎常侍出為義武節度使僭僭車三千乘

歲艱鹽海濱民苦之中立置飛雪將數百人具舟以載  
自是民不勞軍食足矣大中十二年大水汎徐兗青鄆  
而滄地積卑中立自按行引御水入之毛河東注海州  
無水災卒年四十八贈工部尚書

杜亞字次公京兆人肅宗在靈武上書論當世事擢校  
書郎杜鴻漸節度河西奏署幕府入朝歷吏部員外郎  
鴻漸為山南劍南副元帥亞與楊炎並為判官丹遷諫  
議大夫元載得罪亞與劉晏等劾治載死遷給事中常

袞惡之出為江西觀察使德宗立台還亞意必任台宰  
倍道進與人語皆天下大政或以事祈謁輒相然可帝  
知不悅也既又建奏疏濶不稱旨罷為陝虢觀察兼轉  
運使徙河中劉晏抵罪貶睦州刺史興元初入遷刑部  
侍郎又拜淮西節度使至則治漕渠引湖陂築防庸入  
之渠中以通大舟夾隄高印田因得溉灌疏啟道衢徹  
壅通堙人皆悅賴然用度無藝府財耗竭貞元中罷歸  
宰相竇參憚其宿望以檢校吏部尚書留守東都病風

痺且廢猶欲固寵奏墾苑中為營田可減度支歲稟詔許之先是苑地可耕者皆留司中人及屯士占假臣計官更舉軍帑錢與向人至秋取菽粟償息輸軍中貧不能償者發困害畧盡流亡過半又賂中人求兼河南尹帝宥其妄使禮部尚書董晉代之賜亞還病不能謁卒年七十四贈太子少傅諡曰肅

范傳正字西老鄧州順陽人父倫為戶部員外郎與趙郡李華善有當世名傳正舉進士宏辭皆高第授集賢

殿校書郎歷歙湖蘇三州刺史有殊政進拜宣歙觀察使代還坐治第過制憲宗薄不用改光祿卿以風痺卒贈左散騎常侍

孟簡字幾道德州平昌人同州刺史說之曾孫

隱逸傳云說汝

州梁人糾謬云平昌孟氏之望

擢進士第登宏辭科累官至倉部員外

郎以不附王叔文宰相韋執誼為徙他曹

舊書連司封郎中

元

和四年拜諫議大夫知匭事王承宗叛詔以吐突承璀為招討使簡抗疏論之出為常州刺史開古孟漬長四



十一里溉田四千餘頃。廉使舉課績八年，加金紫光祿大夫，徵為給事中。九年，出為越州刺史。兼御史中丞、浙東觀察使。始，李遜抑士族右編人及簡為政，反之。農估兼受其弊。時謂兩失之。十二年，入為戶部侍郎，加御史中丞，出為襄州刺史。山南東道節度使十四年，詔置臨漢監牧馬，命簡充使。職簡奏請均州鄖鄉縣鎮，逼使趙潔充本縣令。臺司奏有虧刑典，罰一月俸，改授太子賓客。分司東都。穆宗立，以簡在襄陽故殺腹心吏陸翰，翰

子弟詣闕訴冤廢簡姦賊御史劾聽得遺吐突承璫賢  
七千餘貫再貶吉州司馬長慶元年大赦量移睦州刺史  
復徙常州三年仍入為太子賓客分司東都其年十  
二月卒簡早歲工詩名聞江淮俊拔尚義交友歿能卹  
其孤晚路殊躁急佞佛過甚為儒者所誚

劉伯芻字素芝兵部侍郎迺之子志行修謹淮南杜佑  
辟為從事府罷徵拜右補闕遷主客員外郎數過友家  
飲豪為韋執誼陰劾貶虔州掾曹後為考功員外郎裴

珣善其應對機捷遷考功郎中集賢院學士轉給事中  
李吉甫復相與珣宿嫌珣卒不加贈伯芻為申理乃贈太  
子少傅或言其妻珣從母也吉甫欲按之求補虢州刺史  
稍遷刑部侍郎俄知吏部選事元和十年以左常侍致  
仕卒年六十一贈工部尚書伯芻風度高嚴善談議而  
動與時適論者少之子寬夫

寬夫寶曆中為監察御史奏以王府官攝祭位輕非嚴  
恭意請以尚書省東宮三品若左右丞侍郎通攝俄轉

左補闕陳岵注維摩經因供奉僧進得濠州刺史寬夫  
與同列因對論之敬宗怒謂宰相曰岵不因僧得郡諫  
官安得此言須推排頭首來寬夫奏曰昨論陳岵時不  
記發言前後獨臣草狀應伏誅推言所從恐累國體帝  
嘉其引過釋之寬夫弟端夫為太常博士駁韋綬謚議  
知名寬夫子允章字蘊中咸通中為禮部侍郎請諸生  
及進士第並謁先師衣青衿介幘以還故制改國子祭  
酒又建言羣臣輸光學錢治庠序宰相五萬節度使四

萬刺史萬詔可後為東都留守黃巢至分司李璣挈尚書印走河陽允章寄治河清巢僭號輒受偽官文書盡用偽年號遣取印璣所璣不與更悔愧移檄近鎮起兵捍賊璣持印還之後廢於家

楊憑字虛受一字嗣仁號州弘農人少孤其母訓導有方長善文辭與弟凝凌皆有名凝擢進士第時號三楊憑重交遊尚氣節然諾與穆質許孟容李廌相友善稱楊穆許李歷事節度府召為監察御史累遷太常少卿

湖南江西觀察使性簡傲接下脫畧人多怨之在二鎮尤侈汰元和四年拜京兆尹與御史中丞李夷簡素有隙因劾憑江西姦賊及他不法詔刑部尚書李鄲大理卿趙昌即臺叅訊時憑治第永寧里功役叢煩又廣蓄妓妾於永樂里別舍謗議頗喧故夷簡籍之痛摘發欲抵以死憲宗以憑治京兆績但貶臨賀尉德宗時假借方鎮習為僭擬夷簡首按憑時以為宜而緣私怨論者亦不與俄徙杭州長史以太子詹事卒憑所善客徐晦

者字大章第進士賢良方正擢櫟陽尉

舊書云皆自及  
楊憑所薦

得罪姻友無往候者獨晦至藍田慰餞故相權德輿與  
憑交最深謂晦曰今日送臨賀誠厚無乃為累乎晦曰  
方布衣時臨賀知我今恐遽棄乎有如公異時為姦邪  
潛斥又可爾乎德輿稱之朝夷簡遽表為監察御史晦  
白夷簡曰生平不踐公門公何取信而見獎拔夷簡曰  
君不負楊臨賀肯負國乎由是知名拜中書舍人太和  
四年拜兵部侍郎五年為太子賓客分司東都晦性彊

直當官守正嗜酒喪明以禮部尚書致仕開成三年卒  
贈兵部尚書

凝字懋功由協律郎三遷侍御史為司封員外郎坐釐  
正嫡媵封邑為權幸所忌徙吏部稍遷右司郎中宣武  
董晉表為判官亳州刺史缺晉以凝行州事增墾田決  
汙堰築隄防水患訖息時孟叔度縱橫撓軍治而凝亦  
荒酒晉卒亂作凝還京師闔門三年拜兵部郎中卒凌  
字恭履最善文終侍御史子敬之



敬之字茂孝元和初擢進士第平判八等遷右衛胄曹  
叅軍累遷屯田戶部二郎中坐李宗閔黨貶連州刺史  
文宗好儒以宰相鄭覃兼國子祭酒俄以敬之代兼太  
常少卿是日二子戎戴登科時號楊家三喜轉大理卿  
檢校工部尚書兼祭酒卒敬之嘗為華山賦示韓愈愈  
稱之傳布士林性愛士類得其文章孜孜玩諷人以為  
癖雅愛項斯為詩所至稱之由是擢上第斯字子遷江  
東人敬之嘗祖客灞上見閩人濮陽愿閱其文遍語公

卿間會愿死敬之為斂葬

潘孟陽父炎大歷末官右庶子為元載所惡久不遷載誅進禮部侍郎以病免婦翁劉晏任權時雖書疏報答未嘗輒開晏得罪坐貶澧州司馬興疾上道不自言于邵高其介申救不見聽孟陽少以蔭進登博學宏辭科累遷殿中侍御史公卿多父友及外祖賓從故得薦用累至兵部郎中貞元末王紹以恩倖進數稱其才權知戶部侍郎杜佑判度支奏以自副憲宗立命巡江淮省

財賦加鹽鐵轉運副使并察諸使治否孟陽以豪倨所  
至務遊賞倡樂夜飲且招金錢補吏大失人望使還罷  
為大理卿後鄭敬宣慰江淮帝丁寧以孟陽為誠元和  
三年出為華州刺史遷劍南東川節度使宰相武元衡  
與孟陽舊復以戶部侍郎召判度支又兼京北五城營  
田使太府卿王遂為西北供軍使以營田非便持之不  
下孟陽忿恨形於言二人俱請對帝怒罷孟陽左散騎  
常侍四年復本官咸亨第舍帝微行至樂游原望見之

以問左右孟陽懼輟不敢治而伎媵用度過侈汰人多  
指怒之病風痺改左散騎常侍十年八月卒贈兵部尚  
書諡曰康初孟陽為侍郎年未四十其母謂曰以爾之  
材而位丞郎使吾憂之

崔元畧博州人

舊書作博陵人

第進士歷佐使府元和八年拜

殿中侍御史十二年遷刑部郎中知臺雜事擢御史中  
丞十三年李夷簡為御史大夫詔元畧留司東臺改京  
兆少尹行府事數月遷為尹十四年改左散騎常侍初

中丞缺議者屬崔植而元畧謬謂植入閣不如儀使御史彈治及宰相以二人進元畧果得之植恨悵既當國以元畧宣撫党項使辭疾不行植奏不少責無以示羣臣乃出為黔南觀察使徙鄂岳長慶四年入為大理卿敬宗即位復為京兆尹兼御史大夫收貸錢萬七千緡為侍御史蕭澈彈劾詔三司雜治宦人崔潭峻左右之獄具止削兼秩俄授戶部侍郎諫官斥元畧方劾而遷有助力元畧自解辨乃止寶曆二年京兆尹劉栖楚又

勅元畧前造東渭橋縱吏增估物不償值取工徒贓二萬緡詔奪俸一月於是栖楚規相位疑元畧妨已路故衆疑似譏染之太和三年進戶部尚書四年判度支五年檢校吏部尚書出為東都留守畿汝等防禦使改義成節度使十二月卒廢朝三日贈尚書左僕射子鉉

鉉字台碩擢進士第從李石荆南為賓佐入拜司勳員外郎翰林學士遷中書舍人學士承旨武宗好蹴鞠角抵鉉切諫帝嘉納之會昌三年拜中書侍郎同中書門

下平章事澤潞平兼戶部尚書與李德裕不協罷為陝  
虢觀察使宣宗初以御史大夫召進尚書左僕射兼門  
下侍郎封博陵郡公所善鄭魯楊紹復段瓌薛蒙時語  
曰鄭楊段薛炙手可熱欲得命通魯紹瓌蒙帝聞之題  
於宸鉉欲引魯為相帝不許用為河南尹帝語鉉曰魯  
去矣事由卿否鉉惶懼謝罪後出為淮南節度使帝戲  
太液亭賜詩寵之宣州軍亂逐觀察使鄭薰鉉出兵討  
擊詔兼宣徽池觀察使既平加檢校司空罷兼使居九

年條教一下無復改氏咸順賴咸通初徙山南東道荆  
南二鎮封魏國公龐勛叛自桂管北還所過剽畧鉉聞  
大募兵江湘邀賊歸路賊懼更踰嶺自淮而北朝廷壯  
其忠卒官子沆字內融乾符五年以戶部侍郎同中書  
門下平章事所旦告麻大霧塞廷中百僚就班修慶大  
風雨雹時謂不祥俄改中書侍郎兼工部尚書盧攜專  
政而黃巢勢寢咸沆每建裁過多為攜沮抑賊陷京師  
匿張直方第遇害元畧弟元受元式元儒皆舉進士第



元武宣宗初以刑部尚書判度支拜門下侍郎同中書  
門下平章事進兼戶部尚書卒贈司空諡曰莊

韋綬字子章京兆萬年人有至性然好不經喪父饒臂  
血寫浮圖書為長安尉遭朱泚亂羸服走奉天拜華陰  
令佐襄陽于頓府面刺頓縱恣頓不能容薦諸朝三遷  
職方郎中穆宗為太子綬入侍讀遷諫議大夫嘗密齎  
家所造食入宮餉太子憲宗嘗召對綬奏曰太子書學  
至依字輒去人曰上以此可天下奏事臣子不合全書

帝嘉太子賢賜綬錦綵綬數為俚言以悅太子他日太子為帝道之帝怒曰綬當以經義輔導太子而反語此朕何賴焉出為虔州刺史穆宗立以師友恩召為尚書右丞集賢院學士出入禁中怙寵甚請帝誕日百官先詣光順門賀皇太后然後上皇帝壽詔可宰臣奏古無生日稱賀者綬議格時大臣論啟或未決綬居中助可否九日宴羣臣曲江綬請集賢學士得別會從之長慶元年三月進禮部尚書判集賢院事帝問所以振災邀

福者對曰宋景以一善言退法星三舍漢文除祕祝赦  
有司祭而不祈此皆受自至之福書美前史如失德却  
災媚神丐助神而有知且因以譴也時帝不德故託諷  
焉二年十月檢校戶部尚書為山南西道節度使請門  
戟十二以行又乞賜錢二百萬官子元弼太常丞帝許  
之綬老而貪洎臨戎鎮庶政隳紊卒贈尚書右僕射有  
司謚通醜故吏以為言改謬醜不報罷

按舊書博士劉  
端夫請謚為通

殿中侍御史孟瑄上言以為非當  
博士權安請謚為謬竟不施行

欽定續通志卷二百五十七

欽定四庫全書

欽定續通志卷二百五十八

列傳

唐五十八

歸崇敬

登融

奚陟

張薦

趙涓

李紓

鄭雲達

徐岱

王仲舒

馮伉

盧景亮

王源中

薛革

膺

衛次公

洙

薛戎放

胡証

崔弘禮

崔玄亮

王質

殷侑  
盈孫

王彥威

庾敬休

歸崇敬字正禮蘇州吳人治禮家學多識容典擢明經  
遭父喪孝聞鄉里調國子直講天寶中舉博通墳典科  
對策第一遷四門博士有詔舉才可宰百里者復策高  
等授左拾遺再遷起居郎贊善大夫史館修撰兼集賢  
殿校理修國史儀注以貧求解歷同州長史潤州別駕

未幾有事橋陵建陵召還參掌儀典改主客員外郎復  
兼修撰代宗幸陝召問得失崇敬極陳生人疲敝當以  
儉化天下則國富而兵可用所建禮典如百官朝朔望  
不宜服袴褶東都太廟不當置木主駁方士巨彭祖建  
言四季月郊祀天地議五人帝祭毋稱臣春秋釋奠祝  
版皇帝署行東面之禮事皆施行大厯初授倉部郎中  
充弔祭冊立新羅使海道風濤舟幾壞衆謀以單舸免  
曰共舟數十百人我何忍獨濟少選風息還授國子司

業兼集賢學士八年遣祀衡山未至而哥舒晃亂廣州  
監察御史憚之請望祀而還崇敬正色曰君命豈有畏  
耶遂往皇太子欲臨國學行齒胄禮崇敬以學與官名  
皆不正乃建議請以國子監為辟雍省祭酒為太師氏  
司業為左師右師議格不行坐史給稟錢不實貶饒州  
司馬德宗立召還復拜國子司業稍遷翰林學士左散  
騎常侍充皇太子侍讀又兼晉王元帥參謀封餘姚郡  
公田悅李納稟命持節宣慰稱旨表歸上冢寵賜綵帛



儒生以為榮遷工部尚書仍前職年老以兵部尚書致仕卒年八十八

按舊書作年八十

贈尚書左僕射謚曰宣論撰

數十篇子登

登字沖之事繼母篤孝大厯中舉孝廉高第貞元初策賢良為右拾遺裴延齡得幸德宗欲遂以相右補闕熊執易疏論之以示登登動容曰願竄吾名雷霆之下君難獨處同列有所諫止輒聯署無所回諱轉右補闕起居舍人凡十五年退然遠權勢終不以淹晚槩懷遷兵

部員外郎順宗為皇太子登父子侍讀及即位以東宮恩起拜給事中遷工部侍郎復為皇太子諸王侍讀獻龍樓箴以諷徙左散騎常侍憲宗問政所先登知帝睿而果於斷勸以納諫後判國子祭酒事進工部尚書累封長洲縣男卒年六十七贈太子少師謚曰憲子融

融字章之元和中及進士第累遷左拾遺事文宗為翰林學士進至戶部侍郎開成初拜御史中丞湖南觀察使盧周仁以南方屢火取羨錢億萬進京師融劾奏周

仁陳小利假異端公違詔書徇私希恩請重責還所進  
代貧民租入詔不從置錢河陰院以虞水旱尋遷京兆  
尹李固言為相惡之徙祕書監固言罷擢權知兵部侍  
郎歲間出為山南西道節度使徙東川還歷兵部尚書  
累封晉陵郡公會昌後儒臣少朝廷禮典多本融議辭  
疾以太子少傅分司東都大中七年卒贈尚書左僕射  
奚陟字殷卿其先自譙亳西徙故為京兆人少篤志通  
羣書大厯末擢進士文辭清麗科授弘文館校書郎德

宗立諫議大夫崔河圖持節使吐蕃表陟自副以親老  
辭不拜楊炎輔政召授左拾遺居親喪毀瘠過禮朱泚  
反間道及車駕於興元拜起居郎翰林學士不就職賊  
平改太子司議郎歷金部吏部員外會左右丞缺轉左  
司郎中貞元八年遷中書舍人於是江南淮西皆大水  
詔陟勞問循慰所至人人便安遷刑部侍郎京兆尹李  
充有美政裴延齡惡之誣劾充比陸贄數遺金帛又乾  
沒京兆錢六十八萬緡請付比部鉤校時郎中崔元翰

怨贅揣延齡指逮繫榜掠甚急陟持平具獄上且言京兆錢給縣館傳餘以度支符用度略盡充既免元翰不得意以恚死陟尋知吏部選事遷侍郎銓綜平允卒年五十五贈禮部尚書子敬立位左補闕

張薦字孝舉深州陸澤人祖鷺字文成早慧書無不覽為兒時夢紫文大鳥五色成文止其廷大父曰吾聞五色赤文鳳也紫文鷺鷥也若壯殆以文章瑞朝廷乎遂命以名調露初登進士第騫味道見所對稱天下無雙

授岐王府參軍八以制舉皆甲科再調長安尉遷鴻臚  
丞四參選判策為銓府最員半千稱驚文辭猶青銅錢  
萬選萬中時號驚青錢學士證聖中天官侍郎劉奇以  
驚為御史性褊躁不持士行姚崇尤薄之開元初御史  
李全交劾驚多口語訕短時政貶嶺南刑部尚書李日  
知訟斥太重得內徙驚屬文下筆輒成浮艷少理致然  
大行一時武后時中人馬仙童陷默啜問文成在否答  
曰近自御史貶官曰國有此人不用無能為也

吳縝糾  
謬云證

聖元年至開元元年相去一十九年而薦仍為御史此  
已可疑且薦既於開元初以御史貶官矣何緣武后時  
馬仙童有近自御史貶官之語此一節前後乖舛全不  
可考今按武后時貶官開元初貶嶺南自是二事史敘  
默啜問答于後取與新羅日本之文相次耳若以先後  
言之則薦證聖元年為御史自御史貶官中間復躋朝  
列至開元初又為李全交所劾坐貶嶺南舊聞脫畧史  
失其歷官之詳故新舊二書俱以梗槩之辭言之而吳  
氏聯綴上下以為事實因有十九年為御史之疑且謂  
開元初以御史貶官與馬仙童所稱牽合為一事皆未  
免以辭害意

新羅日本使至必出金寶購之終司門員

今附正之

外郎薦敏銳有文辭初為顏真卿嘆賞大厯中李涵表  
薦才任史官母喪闋于邵以聞召充史館修撰兼陽翟

尉真卿為李希烈所拘遣兄子峴及家僕奏事五輩皆  
留內客省薦上疏請以所逮捕希烈幼弟及妻祖母郭  
妻妹封真境上贖真卿盧杞持之不報朱泚反詭姓名  
匿城中著史遁先生傳京師平擢左拾遺詔復用杞為  
刺史薦與陳京趙需等論杞姦惡不當用入對挺確德  
宗納之貞元元年帝親郊時更兵亂禮物殘替薦為太  
常博士參綴禮儀略如舊章四年闕播送咸安公主入  
回紇薦為判官還遷工部員外郎十一年拜諫議大夫



仍充史館修撰裴延齡用事薦將疏其惡延齡知之奏以薦領史職不宜兼諫議改祕書少監延齡排擯不已會遣使蕃域屢充冊命弔祭二十年至赤嶺東歿於紇壁驛順宗即位計至詔贈禮部尚書謚曰憲薦自拾遺至侍郎二十年皆兼史館三使絕域皆兼憲職以該洽多能敏於占對被選初貞元時京師旱帝避正殿減膳薦白限日以應古制及定昭德皇后廟樂還獻懿二祖定太儀號大臣祔廟鼓吹法莫不參裁諸儒謂博而詳

有文集三十卷及所撰五服圖宰輔略靈怪集江左寓居錄並傳於時子又新希復皆登進士第又新自有傳

孫讀字聖用

舊書云希復子

幼穎解大中時第進士鄭薰辟署

宣州幕府累遷禮部侍郎中和初為吏部選牒精允調者丐留二年詔可榜其事曹門後薰宏文館學士判院事卒

趙涓冀州人幼有文天寶時第進士補郾城尉稍歷臺省河南副帥王縉奏充判官德宗初為衢州刺史永泰

時禁中火近東宮代宗疑之涓以監察御史為巡使迹  
火所來乃出宦人直舍者帝在東宮頗德之及治衢不  
為觀察使韓滉所容奏免官帝以名問宰相曰是豈永  
泰時御史乎對曰然即拜尚書左丞典吏部選從狩梁  
興元元年卒贈戶部尚書子博宣登進士第藻翰豪邁  
沉於酒傲忽少檢陳許曲環辟署於府久不能堪為所  
誣奏流康州時人冤之

李紆字仲舒天寶末為校書郎大厯初李季卿薦為左

補闕累遷中書舍人德宗居奉天選為同州刺史帝次  
梁紆委城趨行在擢兵部侍郎高邑伯反正兼知選事  
李懷光誅河東節度及諸軍會河中詔往宣勞還奏合  
旨拜禮部侍郎建言享武成王廟不宜與文宣王等制  
從之紆性樂易喜接後進其自奉頗華裕不齷齪崖檢  
官雖貴而遊縱自如奉詔為興元紀功述及他郊廟樂  
章論譔甚多進吏部侍郎年六十二卒貞元八年贈禮  
部尚書

鄭雲遠滎陽人父昉為鄆城尉州刺史移職民之暴警者遮道留昉誅殺六七人採訪使奇之言狀擢北海尉安祿山反縣民孫俊毆市人以應昉率衆擊殺之改登州司馬李光弼表為武寧府判官遷沂州刺史諭降賊李浩五千人終滁州刺史雲遠為人誕謔敢言大厯初舉進士去客燕朔以畫干朱泚泚表為掌書記妻以滔女泚將朝使雲遠先入奏同府蔡廷玉潛於泚奏貶為平州參軍

舊書作莫州

滔代泚將復為判官廷玉與朱體微

諧滔於泚雲達漏其語以怒滔故滔論廷玉等得罪死  
滔助田悅雲達諫不從遂棄室歸長安擢諫議大夫帝  
在梁雲達依李晟晟表以禮部侍郎為軍司馬時時咨  
逮戎略元和元年拜右金吾衛大將軍改京兆尹五年  
卒弟方達悖悍結徒剽劫父欲殺之不克雲達自劾不  
能教恐赤臣家詔錮死黔州

徐岱舊書在儒學傳字處仁蘇州嘉興人世農家子於學無所

不通辨論明銳座人常屈大厯中劉晏表為校書郎觀

察使李栖筠署岱所居為復禮鄉薦為偃師尉禮儀使  
蔣鎮薦為太常博士專掌禮事從德宗幸奉天以膳部  
員外郎兼博士貞元初為太子諸王侍讀遷給事中兼  
史館修撰帝以誕日歲詔佛老者大論麟德殿并召岱  
及趙需許孟容韋渠牟講說始三家若矛盾然卒而同  
歸於善帝大悅賚予有差兩官恩遇無比性篤慎未嘗  
泄禁中語亦不談人短宗族遺孤皆為婚嫁惟吝嗇持  
家管鑰為世所譏云卒年五十上賻以帛絹皇太子遺

絹百匹贈禮部尚書

王仲舒

舊書在  
文苑傳

字宏中并州祁人少孤貧事母孝嗜學

工文不就鄉舉所友皆知名士與梁肅楊憑友善貞元  
十年賢良方正高第拜左拾遺德宗欲相裴延齡與陽  
城交章言不可元和五年自職方郎中知制誥仲舒文  
思溫雅制誥出人皆傳寫楊憑得罪斥去無敢過其家  
仲舒屢存問將直憑冤貶峽州刺史除母喪為婺州刺  
史先是州疫旱人徙死幾空居五年里閭增完加金紫



徙蘇州隄松江為路變屋瓦絕火災賦調與民期不擾  
自辦穆宗立思其文宜為誥召為中書舍人既至視同  
列率新進少年居不樂曰豈可復治筆研於其間哉吾  
久棄外周知俗病利得治之不自愧宰相聞除江西觀  
察使江西榷酒利多他州十之八民私釀歲抵死不絕  
仲舒罷酤錢九十萬吏坐失官息錢五十萬悉產不能  
償仲舒焚簿書脫械不問水旱民賦不入出錢二十萬  
代之有為佛老法興祠屋者皆驅出境長慶三年冬卒

年六十二贈左散騎常侍謚曰成仲舒尚義概所居急民廢置自為科條始若煩密久皆稱其便

馮伉

舊書在儒學傳

本魏州元城人父玠家京兆大厯初登五

經秀才科建中四年登博學三史科三遷膳部員外郎充睦王等侍讀李抱真卒伉持節臨弔歸之帛不受德宗以此擢為醴泉令縣百姓多猾著諭蒙書十四篇勸之務農進學而教以忠孝每鄉給一卷居七年韋渠牟薦為給事中皇太子諸王侍讀對殿中賜金紫進兵部

侍郎出為同州刺史以散騎常侍召領國子祭酒者再  
元和四年卒年六十六贈禮部尚書著三傳異同三卷  
子約擢進士第又登制科仕尚書郎

盧景亮字長晦幽州范陽人少孤學無不覽第進士宏  
辭授祕書郎張延賞節度荆南表為枝江尉掌書記入  
遷右補闕景亮志義舉然多激發與穆質同在諫爭地  
書數上鯁殺無所回帝怒貶為朗州司馬質亦斥去廢  
抑二十年至憲宗時由和州別駕召還再遷中書舍人

景亮善屬文根於忠仁有經國志嘗謂人君足食足兵而又得士天下可為也乃起軒項以來至唐剏治道之要著書上下篇號三足記又作答問言輓運大較及陳西戎利害元和初卒贈禮部侍郎憲宗時以直諫知名者又有王源中

王源中字正蒙擢進士宏辭累遷左補闕是時中官領禁兵數亂法捕臺府吏屬繫軍中源中上言臺憲者紀綱地府縣責成之所設吏有罪宜歸有司無令北軍亂

南衙麾下重於仗內帝納之累轉戶部郎中侍郎擢翰林學士進承旨學士以疾出為山南西道節度使入拜刑部侍郎未幾領天平節度使開成三年卒贈尚書右僕射

薛平河中寶鼎人父順為奉天尉與楊國忠有舊及用事將引之輒謝絕平以吏最拜長安令歷虢州刺史憲宗時奏最擢湖南觀察使徙浙東以治行遷浙西加御史大夫累封河東郡公所居守法度務在安人居三鎮

聲樂不聞於家所得祿即分散親屬故人而無餘藏除左散騎常侍年七十致仕卒贈工部尚書謚曰宣

子膺太和初為右補闕內供奉其弟齊佐興元李絳幕府絳遇害齊死於難膺聞不及請馳赴之哀甚聞者垂泣後歷工部員外郎

衛次公字從周河中河東人舉進士第調渭南尉嚴震在興元辟佐其府累遷殿中侍御史貞元中擢左補闕翰林學士德宗崩與鄭綱皆召至金鑾殿時皇太子久

疾禁中或傳更議所立衆失色次公曰太子雖久疾冢  
嫡也內外係心久矣必不得已宜立廣陵王綱隨贊之  
議乃定順宗立王叔文等用事次公與綱多所持正知  
禮部貢舉斥華取實不為權力侵撓由中書舍人充史  
館修撰改兵部侍郎綱以宰相罷坐與善下除太子賓  
客久乃為陝虢州觀察使蠲橫租錢歲三百萬復入為  
兵部侍郎進尚書左丞時方討蔡數建請罷兵帝將相  
之制橐具而蔡捷書至乃追止以檢校工部尚書為淮

南節度使久之召還道病卒年六十六贈太子少傅謚  
曰敬次公本善琴未顯時京兆尹李齊運使子請授之  
次公拒絕因終身不復鼓

子洙舉進士尚臨真公主檢校祕書少監駙馬都尉文  
宗曰洙起名家以文進宜諫官寵之乃為左拾遺歷義  
成節度使咸通中卒

薛戎字元夫河中寶鼎人客毗陵陽羨山年四十餘不  
仕江西觀察使李衡辟署幕府三返乃應故宰相齊映



代衡奏留之府罷復歸陽羨福建觀察使柳冕辟佐其  
府先是馬總佐鄭滑府監軍官人誣劾之貶泉州別駕  
冕欲除總以附倖家即使戎攝刺史按置其罪戎不肯  
從還白其狀冕怒囚之它館環兵脅辱之累月戎終不  
為屈淮南節度使杜佑聞之書責冕會冕亦病死得解  
自放江湖間復為藩府交奏稍遷河南令吐突承璀討  
鎮州所過吏治道前驅惟戎境內按故無所治遂留府  
卒犯令縛置獄留守怒遣將略出之不與累遷浙東觀

察使所部州觸酒禁者罪當死橋未貢先鬻者死戎弛其禁卒年七十五贈左散騎常侍

弟放端厚寡言第進士擢累兵部郎中穆宗為太子拜侍讀及即位參贊機命進工部侍郎集賢學士改刑部侍郎終江西觀察使謚曰簡

胡証字啟中河東人舉進士第渾瑊美其才又以鄉府奏寘幕下繇殿中侍御史為韶州刺史以母老辭為太子舍人更從襄陽于頔署掌書記入為戶部郎中田弘

正以魏博內屬請自副詔兼御史中丞為副使入遷諫  
議大夫元和九年拜振武軍節度使居四年召任金吾  
大將軍又充京西京北巡邊使太和公主降回鶻以檢  
校工部尚書為和親使舊制行人有私覲禮縣官不能  
具召富人子納貲於使而命之官証請儉受省費以絕  
其濫還拜工部侍郎改京兆尹左散騎常侍寶厯初以  
戶部尚書判度支固辭拜嶺南節度使卒年七十一贈  
尚書右僕射

按舊書贈  
左僕射

廣有舶貝奇寶証厚殖財號京

師高訾素與賈餗善李訓敗衛軍利其財聲言餗匿其家爭入剽劫執其子澱內左軍至斬以徇

崔弘禮字從周系出博陵北齊左僕射懷遠六世孫

舊書

作懷遠七世孫按世系表博陵第二房昂字懷遠北齊祠部尚書生液液生洽洽生治治生預預生育育生孚孚生弘禮自昂至弘禮凡七世舊書是也又按崔昂在北齊為右僕射坐事除名後終祠部尚書新書以為左僕射磊磊有大志通兵略及進士第平判異等靈武李

亦誤

樂表為判官以親老不應更署東都留守呂元膺參謀

時天子討蔡李師道謀襲洛脅沮朝廷以釋蔡危弘禮

為緝搦賊情部分設張東都卒無患遷留守判官擢忻  
汾二州刺史田弘正請朝表弘禮徙衛州兼魏博節度  
副使伐李師道弘正多所咨逮又表為相州刺史長慶  
初張弘靖鎮幽州詔弘禮往副未及行軍亂改絳州刺  
史李弼反於汴詔徙河南尹遷河陽節度使治河內秦  
渠溉田千頃歲收八萬斛徙華州刺史改天平節度使  
李同捷叛興李聽合師討之擊賊禹城破之時徐泗節  
度使王智興檄兗海鄆曹淄青當徐道者出車五千乘

轉粟饋軍弘禮度道遠乃自充開盲山故渠自黃隊抵青邱師人大濟加檢校尚書左僕射徙東都留守召還以病自乞改刑部尚書復為留守卒年六十五贈司空崔玄亮字晦叔磁州昭義人貞元初擢進士第累署諸鎮幕府父喪客高郵卧苫終制地下溼因得痺病不樂進取元和初召為監察御史累轉駕部員外郎稍遷密畝二州刺史畝人馬牛生駒犢官籍蹄噉吏得為姦玄亮焚其籍歷湖曹二州太和四年繇太常少卿改諫議

大夫拜右散騎常侍每遷官輒讓形於色鄭注構宋申  
錫捕逮倉卒內外震駭玄亮率諫官叩延英苦諍反復  
數百言文宗未諭玄亮置笏在陛曰孟軻有言衆人皆  
曰殺之未可也卿大夫皆曰殺之未可也天下皆曰殺  
之然後察之乃寘於法今殺一凡庶當稽典律况欲誅  
宰相乎臣為陛下惜天下法不為申錫言也俯伏流涕  
帝感悟繇此名重朝廷頃之移疾歸東都召為虢州刺  
史卒年六十六贈禮部尚書

王質字華卿五世祖通為隋大儒質少孤客壽春力耕養母講學不勸諸生從者甚衆舉進士中甲科繇祕書省正字累佐帥府五遷侍御史繇山南西道節度副使再轉諫議大夫宋申錫之得罪質與諫官伏閣文宗開延英召見泣涕陳諫帝稍寤申錫得不死為宦豎所惡出虢州刺史李德裕素器之擢給事中河南尹徙宣歙觀察使卒年六十八贈左散騎常侍謚曰定

殷侑陳州人幼志學不治貲產長通經術貞元末及五



經第長於禮擢太常博士元和八年回鶻請和親朝廷

以費劇欲紓期詔侑副宗正少卿李孝誠使回鶻

按舊書李

孝誠奉使回鶻以侑為副新書詔侑下脫副字

可汗驕甚盛陳甲兵欲臣使者

侑不為屈還還虞部員外郎王承宗叛遣侑招諭承宗

聽命進諫議大夫侑論朝廷治亂得失前後凡八十四

通以語切出為桂管觀察使寶歷元年徙江西所至以

潔廉稱入為衛尉卿文宗即位李同捷叛而王廷湊陰

為脣齒兵久不解詔五品以上官議尚書省帝銳欲討

賊侑請舍廷湊而專事同捷帝不納然內嘉尚同捷平  
以侑嘗為滄州行軍司馬遂拜義昌軍節度使時瘡荒  
之餘侑單身之官安足羸淡與下共勞苦以仁惠為治  
歲中流戶襁屬而還遂為營田丐耕牛三萬詔度支賜  
帛四萬匹佐其市初州兵三萬仰稟度支侑始至一歲  
自以賦入贍其半二歲則周用乃奏罷度支所賜戶口  
滋饒以勞加檢校吏部尚書六年徙天平節度裁制經  
費歲以錢十五萬緡粟五萬石歸有司加檢校尚書右

僕射御史大夫溫造劾侑違制擅賦斂民為無名之獻  
詔以庾承宣代還帝終嘉侑進刑部尚書復用為天平  
節度開成元年再召為刑部尚書時李訓鄭注已誅帝  
問侑治安術侑言朝廷宜任耆德毋輕用新進帝善之  
賜綵三百匹初鹽鐵度支使屬官悉得以罪人繫在所  
獄或私置牢院而州縣不聞知歲千百數不時決侑奏  
許州縣糾列所繫申本道觀察使并具獄上聞許之涇  
原節度使朱叔夜坐侵牟贓家畜兵器罷為左武衛大

將軍侑薄其罪天子由是疏之賜叔夜死出侑為山南東道節度使坐減兵不先論啟左遷太子賓客分司東都俄領忠武軍節度卒年七十二贈司空孫盈孫

盈孫廣明初為成都諸曹參軍僖宗至蜀聞有禮學擢太常博士光啟三年帝將還京而七廟焚殘告享無所盈孫創定其禮龍紀元年昭宗郊祠兩中尉及樞密皆以宰相服侍盈孫言先世典令無內官朝服侍祠必欲之當隨所攝資品雖無援據猶免僭逼詔可時喪亂後

制度彫紊追補容典皆盈孫折衷焉終大理卿贈吏部尚書

王彥威其先出太原少孤家無貲自力於學淹識古今典禮舉明經甲科未得調求為太常散吏卿知其經生補檢討官彥威采隋以來訖唐凡禮沿革皆條次彙分號元和新禮上之有詔拜博士憲宗以正月崩有司議葬用十二月下宿彥威言天子之葬七月愆期非禮有詔更用五月淮南李夷簡上言大行皇帝功高宜稱祖

穆宗下其議彥威言宜稱宗制可累擢司封郎中弘文館學士諫議大夫李師道既平其十二州賦法未均詔彥威為勘定兩稅使差量纖悉人不為煩還兼史館修撰下遷河南少尹俄改司農卿李宗閔執政雅善之進拜平盧節度使開成初召為戶部侍郎判度支彥威亦善吏事但經總財用出入米鹽非所長也始神策軍多以粟餼於度支取直吏私增賈厚給之經用益耗開成初有詔禁止時宦者仇士良魚弘志方用事彥威乃奏

復與直悅媚士良等又劾王播貢羨羸以冀速進會邊  
兵訴所賜不時鱣皆敝惡貶衛尉卿俄檢校禮部尚書  
為忠武節度使毀山房三千餘所盜無所容徙節宣武  
封北海縣子卒贈尚書右僕射謚曰靖

庾敬休

舊書在  
忠義傳

字順之鄧州新野人祖先烈與弟光先

不受祿山偽官遁去光烈終大理少卿光先吏部侍郎

父何

舊書  
作河

當朱泚反又與季弟倬逃山谷何終兵部郎

中敬休舉進士又中宏辭辟宣州幕府入拜右補闕起

居舍人建言天子視朝宰相羣臣以次對言可傳後者承旨宰相示左右起居則載錄季送史官如故事詔可既而執政以幾密不可露罷之文宗將立魯王為太子

慎選師傅以戶部侍郎

舊書作工部

兼魯王傳初劍南西川

山南西道歲征茶及除陌錢戶部自遣巡院主之募賈人入錢京師太和元年崔元略奏責本道主當歲上度支四萬緡久之逗留多不至敬休始請置院秭歸收度支錢乃無逋沒又奏兩川米價騰踊百姓請糶本道闕



官職田錄米以救貧民從之再為尚書左丞太和九年  
三月卒於家贈吏部尚書敬休姿容溫雅襟抱夷曠不  
飲酒茹葷不通聲色著諭善錄七卷弟簡休亦至工部  
侍郎



欽定續通志卷二百五十八